



PERGUNTAS ELEITORES BA KAMPAÑA PARTIDU POLITIKU SIRA

La'o Hamutuk nudar Organizasaun Sossiedade Sivil ne'ebé monitor no analiza prosesu dezenvolvimentu.

Iha Jullu ita-boot sira sei hili Deputadu/a sira iha Parlamentu Nasionál. Prosesu ne'e nudar dalan demokrasia atu determina futuru ita-boot sira no jersaun futuru.

Daudauk ne'e prosesu eleitoral ba kampaña polítiku la'o hela, ami hanoin partisipasaun ita-boot sira sei ajuda futuru ukun-na'in sira atu decide política ne'ebé di'ak no apropriadu ba kontestu réal Timor-Leste.

Aleinde atu ajuda ita-boot sira hodi komprende kada partidu nia programa iha tinan lima oin mai, no mos bele ajuda hodi vota tuir konsiensia no matenek.

Nune'e ami distribui perguntas atu ajuda ita-boot sira hodi participa ba prosesu kampaña diálogo. Eleitores sira bele utiliza kada perguntas hodi husu ba partidu polítiku sira durante sira hala'o sira nia kampana iha fatin ne'ebe deit.

Perguntas hirak ne'e mak hanesan tuir mai:

Ekonomia

- Dadauk ne'e, metade ekonomia rai laran no mos besik atividade estadu nian tomak **finansia husi reseitas petrolifeira**. Política saida mak ita-boot nia partidu polítiku sei halo atu kontinua servisu estadu no sustenta povu nia moris bainhira mina-rai maran no Fundu Petrolíferu sai mamuk iha tinan 12 tuir mai?

- Dadauk ne'e, liu metade orsamentu estadu gasta ba infra-estrutura física, liu-liu eletri-sidade. No aloka uitoan de'it ba rekursu umanu, hanesan **edukasaun no saúde** Ita hanoin di'ak atu kontinua prioridade hanesan ne'e, ka atu dezenvolve kapasidade povu Timor-Leste atu lori nasaun ba oin?



- Tinan 10 tuir mai, número **populasaun joven sei sae maka'as, no dezempregu bele aumenta kompara ohin laron**. Política saida mak ita-boot nia partidu polítiku sei trasa atu ajuda Timor-Leste hodi bele enfrenta problema ne'e, no rekursu umanu saida mak ita-boot nia partidu polítiku sei prioritiza atu dezenvolve nasaun ida ne'e?



- Governu Timor-Leste foin hahú atu **em-presta husi rai li'ur**, no iha planu atu **em-presta barak liu tan atu finansia Planu Estratéjiku Dezenvolvimentu Nasionál**. Oinsá Timor Leste bele selu fali tusan, bainhira mina no gás hotu ona?
- Dadauk ne'e Governu prioritiza mos projetu Tasi Mane iha Kosta Súl ne'ebé sei **sadere ba kampu gas Greater Sunrise**. Karik kadoras Greater Sunrise labele lori mai iha Timor-Leste, projetu ne'e atu sadere tan ba saida? Ita-boot nia partidu polítiku nia hanoin katak ne'e investimentu ka sei gasta de'it osan povu nian?
- Karik Governu dezenvolve duni **projetu Tasi mane** ne'e, ita nia partidu polítiku nia hanoin katak projetu ne'e sei fó servisu ba ema Timor barak? **ka benefisiu de'it ema riku sira duke ema kiak?** Oinsa ita nia Partidu nia aprosimsaun kona-ba partisipasaun fetu ho mane iha projetu ne'e?

Governasaun no Justisa

- Durante okupasaun ilegál Indonézia ne'ebé oho ema besik rihun atus rua hafoin ukun-an **impunidade nafatin prevalese, ba Jenerál sira iha Indonézia** ne'ebé envolve iha krime kontra umanidade iha Timor Leste, karik ita-boot nia partidu polítiku hanoin ne'e importante ba autór kriminozu sira atu ba hatan iha Tribunál? Polítika saida mak ita nia partidu sei halo atu hakotu impunidade ne'e?
- Dadauk ne'e TL seidauk ratifika **Konvensaun Internasionál ba Ema Lakon** (International Convention for the Protection of All Person from Enforced Disappearance), ita boot nia partidu polítiku hanoin ne'e presiza atu ratifika? Karik hakarak ratifika, oinsa atu implementa konvensaun ne'e tuir ita-boot nia partidu polítiku sei prefere?



- **Korrupsaun** nudar obstaklu ba dezenvolvimentu, liu-liu iha nasaun ne'ebé nia orsamentu estadu **depende ba reseitas petrolifeiru hanesan Timor-Leste**. Polítika saida mak ita-boot nia partidu polítiku sei trasa atu prevene korrupsaun, inklui iha Institutu Públiku no Empreza Públiku iha Timor-Leste?
- Dadauk ne'e Timor-Leste esforsu an atu tama ba iha ASEAN maibé iha parte seluk, besik hotu membru ASEAN apoiu okupasaun ilegál Indonézia iha Timor-Leste durante tinan 24. Saida mak ita boot nia partidu polítiku sei halo atu ajuda **hapara violasaun direitus umanu** iha ASEAN laran hanesan iha Burma no Papua Barat?



Agrikultura

- Eis Prezidente Ramos-Horta **veto ba lei tolu kona ba asesu ba rai** tanba nia hare lei hirak ne'e bele viola direitu ba povu ki'ik. Oinsá ita boot nia polítika partidu ninian atu próteze no asegura direitu povu ki'ik sira hodi asesu ba rai?



- Polítika saida mak ita nia partidu sei trasa atu **dezenvolve ekonomia produtivu ne'ebé sustentavel**, hanesan agrikultura, atu hamenus dependénsia ba ekonomia husi esportasaun rekursu naun-renovavel? Oinsá ita nia polítika partidu nian hodi hamenus importasaun ai han no nesidade baziku atu Timor-Leste bele atinje soberania ekonómiku no ai han?

La'ó Hamutuk nia staf sira:

Juvinal Dias, Charles Scheiner, Ines Martins, Mariano Ferreira, Alexandra Arnassalon, Odete Moniz, Celestino Gusmão, Tonilia Dos Santos Fatima, Adilsonio da Costa Junior